

PROPOSTA OJE 2019 PASA IHA FINAL GLOBAL HO VOTU A FAVOR 40 :PM-TMR “OJE 2019 Ba Mudansa, Normalidade no Impulsu Investimentu Privadu”

Dili, 22 Dezembru 2018: Hafoin liuhosi diskusaun naruk entre reprezentante povu ho Governu durante loron sanulu resin tolu iha uma Fukun Povu nian (PN), ikus mai, iha Sábado semana ikus ohin, proposta Orsamentu Jeral 2019 ho total billaun \$2, 132 , pasa ona iha final global ho votu a favor 40, kontra 25 no abstensaun o.

Iha liafuan ikus, S. Exa. Primeiru-Ministru Taur Matan Ruak hateten, OJE 2019 kumpri objetivu boot tolu hanesan, orsamentu ba mudansa, orsamentu atu fila fali ba normalidade no orsamentu ida atu impulsu ba investimentu privadu.






Diskursu S.Exa.Primeiru-Ministru Taur Matan Ruak klike iha ne'e
:<https://www.gpm.gov.tl/diskursu-s-exa-primeiru-ministru-taur-matan-ruak-enseramentu-ba-votasaun-final-global-proposta-orsamentu-jeral-estadu-tinan-2019-nian/>

*“Orsamentu ida, kumpre objetivu boot tolu hanesan ha'u temi tiha ona iha ha'u nia diskursu aprezentasaun nian, iha loron 6 fulan dezembru liu bá, liu-liu: **Orsamentu ida ba mudansa** – tanba apostu liu ba papél ne'ebé ativu liután husi Estadu no husi País iha dezvoltimentu ba ita nia rekursu natural sira, ho sosa asaun ConocoPhillips no Shell Austrália ninian; **Orsamentu ida atu fila fali ba Normalidade Loloos** – ho kontinuidade husi investimentu sira iha infraestrutur no servisu báziku sira kona-ba edukasaun, saúde, abitasaun, konetividade, asesu ba eletrisidade, bee ka saneamentu, investimentu hirak ne'ebé esensial atu rekupera nivel kresimentu nian sira ne'ebé rejista ona to'o tinan 2016; no **Orsamentu ida atu fó impulsu ba investimentu Privadu** – ne'ebé marka inísiu husi implementasaun projetu boot sira, liu husi Parseria Públiku-Privada sira”,* dehan Xefe Governu iha nia mensajen.

Liután Xefe Governu dehan maske mosu dúvida barak, maibé Governu fiar katak ne'e hanesan pasu loloos ida ne'ebé maka País presiza atu haree ba futuru ho fiar metin, hodi hafoun kompromisu kona-ba implementasaun ida ne'ebé kuidada, responsavel, efikas no eficiente, tuir prátika internasionál sira ne'ebé di'ak liu kona-ba responsabilidade no transparénsia pública.

Xefe Governu mós aproveita agradese ba Prezidente Parlamentu no deputadu sira hotu ne'ebé iha loron sanulu resin tolu nia laran kontribui ona ho pozitivu liuliu opozisaun iha diskusaun kle'an no pozitivu ho sentidu estadu ne'ebé boot hodi tau intrese aas liu povu nian duke ideolojia política ne'ebé sira representa ba.

OJE 2019 ne'ebé aprovalu ho kategoria hanesan;

-  Saláriu no Vensimentu millaun \$214,225
-  Bens e Serbisu, millaun \$472,880
-  Transferénsia Pública, billaun \$1.012,698
-  Kapitál minor, millaun 29, 401 no
-  Kapitál Dezenvolvimentu; millaun \$400,721. HOTU